



Иоаннай бэшэһэн нэгэдэхи хандалга

Амидаралгын Үгэ тухай

1 ¹ Бидэ амидаралгын Үгэ тухай иигэжэ мэдээсэнэбди: анханһаа нааша амидаралгын Үгэ бии байгаа, бидэ тэрэ Үгэ дуулаа шагнаабди, нюдөөрөө хараабди, гараараа хүрөөбди. ² Тэрэ амидаралга бидэндэ харуулагдаһан байна, тэрэ амидаралгыг хараабди. Тиин тэрэ амидаралга тухай гэршэлнэбди. Хэтэ мүнхын тэрэ амидаралга Эсэгэтэй хамта байжа, бидэндэ үзүүлэгдэһэн юм гээд бидэ таанарта мэдээсэнэбди. ³ Бидэнтэй таанарай нүхэсэхын тула хараһан, дуулаһан юумэеэ бидэ таанарта мэдээсэнэбди. Харин бидэнэр Эсэгэ Бурхантай, тэрэнэй хүбүүн Иисус Христостой нүхэсэнэбди. ⁴ Ехэтэ баясахынгаа тула бидэ энээн тухай бэшээнэбди.

Бурхан хадаа гэрэл туяа мүн

⁵ Тэрээнһээ дуулаһан мэдээсэлээ бидэ таанарташые дуулганабди: Бурхан хадаа гэрэл туяа мүн, харанхы ямаршые юумэн Бурханда байдаггүй! ⁶ «Бидэ Бурхантай нүхэсэнэбди», – гэжэ хэлээд, урдынхяараал нүгэлэй харанхы соо һуугаа хаа, бидэ худалаар хэлэһэн болонобди, үнэн зүб бэшээр ажаһууна гээшэбди. ⁷ Хэрбээ Бурхандад аялар гэрэл туяа соо бидэн байгаа хаа, хоорондоо бидэ эбтэй гээшэбди, тиин Бурханай Хүбүүн Иисусай шүһаниинь маниие ямаршые нүгэл шэбэлһээ арюудхан сэбэрлэнэ гээшэ. ⁸ Бидэ нүгэл хилэнсэ хээгүйбди гээ хаа, бидэ өөһэдыгөө мэхэлнэбди. Энэнь манда үнэн зүб юумэн үгы гэһэн удхатай болоно. ⁹ Хэрбээ нүгэл шэбэл хэһэнээ бидэнэй мэдэрээ юм хаа, үнэншэ зүб Бурхан нүгэл шэбэл хэһыемнай хүлисэхэ, бүхы муу юумэнһээ маниие арюудхан сэбэрлэхэ. ¹⁰ «Бидэ нүгэл хээгүйбди», – гэжэ бидэнэй хэлээ хаа, Бурхание бидэ худалша мэтээр харуулһан болонобди. Бурханай Үгэ бидэнтэй байгаагүй болоно гээшэ.

Христос маниие Хамгаалагша мүн

2¹ Үхибүүдни, саашадаа нүгэл шэбэл хэхэгүйнтнай тула би энээнине бэшэнэб. Хэрбээ хэн нэгэнэй нүгэл хээ хаа, Эсэгэ Бурханай урда маниие Хамгаалагша, үнэн сэдхэлтэ Иисус Христос бий юм. ² Бидэнэй хэһэн нүгэлэй, гансашье бидэнэй бэшэ, харин бүхы дэлхэйнхинэй хэһэн нүгэлэйнь түлөө Иисус өөрыгөө үргэл болгон байна. ³ Бурханай захяа заабариие сахидаг болоходоол Бурханиие бидэ мэдэнэбди гэжэ лаб найдахабди. ⁴ Бурханай захяа заабариие сахидаггүй аад, «Бурханиие би мэдэнэб», – гэжэ хэлэдэг хүн худалша гээшэ, үнэн юумэн тэрэ хүндэ үгы! ⁵ Бурханай үгэ дуулагша хүн Бурханда үнэн сэдхэлһээ дуратай байна. Бурхантай нэгэн хамта байһанаа бидэ иигэжэл мэдэхэ болонобди. ⁶ Бурхантай нэгэн хамта байнаб гэгшэ болбол Иисустал адляар ажаһууха ёһотой.

Шэнэ захяа заабари

⁷ Инаг хайрата нүхэдни, минии бэшэжэ байһан юумэн шэнэ захяа заабари бэшэ, хуушан захяа заабари юм. Энэ захяа заабариие таанар анханһаа хойшо мэдэнэт. Тэрэ хуушан захяа заабари – бидэнэй дуулаһан мэдээсэл гээшэ. ⁸ Гэхэтэй хамта, минии бэшэжэ байһан юумэн шэнэшье захяа заабари мүн. Энэ захяа заабари үнэн зүб юм гэжэ Христосойсье, таанарайсье ажабайдал харуулна. Нүгэлэй харанхы хүнэн ошожо байна, ёһотой гэрэл туяа сасаран гэрэлтэжэ байна! ⁹ Би гэрэл туяа соо байнаб гэдэг аад, өөрынгөө аха дүүдэ дурагүй хүн мүнөө болотор нүгэлэй харанхыда байна гээшэ. ¹⁰ Аха дүүдээ дуратай хүн гэрэл туяа соо ябана. Тэрэ хүн өөрынгөө аяг зангаар дүтынгөө хүниие нүгэлдэ оруулха ушар шалтаганыинь болохогүй. ¹¹ Аха дүүдээ дурагүй хүн нүгэлэй харанхы соо ябана, тэрэ хүн хайшаа тэмтэржэ ябаһанаа мэдэнэгүй, яахадааб гэбэл, тэрэ хүниие нүгэлэй харанхы хохор болгоно. ¹² Үхибүүдни, би таанадта хандажа бэшэнэб: таанарай хэһэн нүгэл хилэнсэтнай Христосой алдар нэрын аша туһада хүлисэгдэбэ. ¹³ Эсэгэнэр, би таанадта хандажа бэшэнэб: анханһаа хойшо оршожо байдаг Бурханиие таанар мэдэнэт. Залуушуул, би таанадта хандажа бэшэнэб: таанар шолмосые диилээт. ¹⁴ Үхибүүд, би таанадта бэшэбэб: таанар Эсэгэ Бурханиие мэдэбэт. Эсэгэнэр, би таанадта бэшэбэб: анханһаа хойшо оршожо байдаг Бурханиие таанар мэдэбэт. Залуушуул, би таанадта бэшэнэб: таанар ехэ хаба шадалтайт, Бурханай Үгэ таанартай

байна, тийн таанар шолмосые диилээт. ¹⁵ Газар дэлхэйдэ бү дурлагты, газар дэлхэй дээрэхи юумэндэ бү дурлагты. Газар дэлхэйдэ дурлаа хаа, Эсэгэ Бурханда дурагүй гээшэт. ¹⁶ Ушарынь гэбэл, газар дэлхэйн бүхы юумэнүүд: нүгэл шэбэлые хэхэ шунал, нюдэнэй хүсэл шунал, омог бардам зан Эсэгэ Бурханһаа заяагдаагүй, харин газар дэлхэйһээ бии болоо. ¹⁷ Харин газар дэлхэй энэ дэлхэйдэ найшаагдадаг бүхы юумэнтэй хамта хүнэн халаха. Эсэгэ Бурханай дура хүсэлые сахин бөөлүүлэгшэл хэтэ мүнхэдөө амиды ябаха юм.

Христосой дайсан

¹⁸ Үхибүүд, һүүлшын саг хүрэжэ ерэбэ! Христосой дайсан ерэхэ ёһотой гэжэ таанар дуулаһан байхат. Тийн Христосой дайсад мүнөө олон болонхой. Иихэдээ һүүлшын саг хүрэжэ ерэбэ гэжэ мэдэнэбди. ¹⁹ Христосой дайсад маниие хаяад ябаа һэн, теэд тэдэнэр манай хүнүүд байгаа гэхын аргагүй. Хэрбээ манай хүнүүд байгаа хаа, тэдэнэр манаар сугтаа үлэхэ һэн. Теэд бидэниие орхёод ошоһон ушарынь тодоруулбал, тэдэ манай хүнүүд бэшэ һэн. ²⁰ Таанарта Нангин Һүлдэ Бурханһаа үгтөө, тиимэһээ таанар бүхы юумэ мэдэнэт. ²¹ Таанар үнэн зүбые мэдэнэгүйт гэжэ би таанадта бэшээгүйб. Үгы даа, таанадта иигэжэ бэшээ һэм: таанар үнэн зүбые мэдэнэт, тийн ямаршые худал юумэн үнэн юумэнһээ тад ондоо байдаг гэжэ бэшээб. ²² Худалша гээшэмнай хэн гээшэб? Иисусые Бурханай табисуурта Христос гэжэ тоолодоггүй хүн худалша мүн. Христосой дайсан хадаа Эсэгэ Бурханай, тэрэнэй Хүбүүнэй оршожо байһые арсагша юм. ²³ Хүбүүндэнь этигэдэггүй хаа, Эсэгэгүй байна гэхэн удхатай юм. Хүбүүндэнь этигэдэг хүн Эсэгэтэйн хамта байна. ²⁴ Анха түрүүн юун гэжэ дуулаа һэмта, тэрээндээл этигэжэ байгты! Хэрбээ энээндэ саашадаа этигэжэ байгаа хаа, таанар Хүбүүнтэйн, Эсэгэтэйн хамта байхат. ²⁵ Христос бидэндэ мүнхын Амидаралга үгэхэб гэжэ найдуулаа! ²⁶ Таанарые мэхэлхээ һанагшад тухай эдэ бүгэдые би таанадта бэшээбэб. ²⁷ Бурханай таанадта үгэхэн Нангин Һүлдэ сэдхэлдэтнай байна, тиимэһээ таанарые хэн нэгэнэй хургаһанай хэрэгынь үгы. Нангин Һүлдэ таанарта үнэн зүб юумэ хэлэнэ, худал юумэ хэлэнэгүй, тиигэжэ таанарые бүхы юумэндэ хургана. Нангин Һүлдын хургаһан ёһоор таанар Христостой нэгэн хамта байгты.

Бурханай үхибүүд

²⁸ Үхибүүд, мүнөө таанар Христостой нэгэн хамта байгты. Тиигээ хаа, тэрэнэй бусажа ерэхэдэнь, бидэ айхые мэдэхгүйбди, эшэхэ-гүйбди. ²⁹ Христосые үнэн сэдхэлтэй гэжэ таанар мэдэдэгта, тиимэхэ үнэн сэдхэлээрнь байдаг хүн Бурханһаа түрэнэн хүн гэжэ таанар баһа мэдэнэт.

3 ¹ Таанар хараад үзыт, Эсэгэ Бурхан маанадта ямар ехэ дуратай байгаа гээшэб! Бидэнэр Бурханай үхибүүд гэжэ нэрлэгдэнэбди. Үнэхөөрөөшье тиимэбди! Газар дэлхэйнхин бидэниие Бурханай үхибүүд гэжэ мэдэнэгүй, юундэб гэбэл, Бурханиие тэдэ мэдэнэгүй бшуу. ² Инаг хайрата аха дүүнэрни, бидэ мүнөө Бурханай үхибүүд гээшэбди, теэд саашадаа ямар болохоннай үшөөл мэдэгдэнэгүй. Христосой ерэхэдэ тэрэндэл адли болохобди гэжэ ойлгонобди, юундэб гэбэл, бидэ тэрэниие үнэн бодото зандань харахабди. ³ Христосто иимэ этигэл найдабаритай байгаа хаа, алишье хүн өөрыгөө арюудхана, ушарынь гэбэл, Христос арюун нангин байгаа. ⁴ Нүгэл хилэнсэ хэгшэ хүн бүхэн гэмтэ ябадал гаргана; нүгэл хилэнсэ болбол гэмтэ ябадал мүн. ⁵ Христос өөрөө нүгэл хээгүй аад, хүнүүдые хэһэн нүгэлһөөнь сүлөөлхээе ерээ гэжэ таанар мэдэнэт. ⁶ Тэрэнтэй нэгэн хамта байгшад нүгэл хэдэггүй. Нүгэл хэгшэд Христосые хараагүй, мэдэрээгүй гээшэ. ⁷ Үхибүүд аа, хэншье таанарые зүб харгыһаатнай бү хадууруулаг! Үнэн зүб юумэ хэгшэ Христостол адли үнэн зүб байгты. ⁸ Нүгэл шэбэл хэгшэ шолмосхоо болоно, юундэб гэбэл, шолмос анханһаа хойшо нүгэл хилэнсэ хэдэг юм. Тиимэхэе шолмосой үйлэ уршагые үгы хэхын тула Бурханай Хүбүүн ерэнэн юм. ⁹ Бурханһаа мүндэлэн гарагша нүгэл хэдэггүй, яахадааб гэхэдэ, тэрэ хүн Бурханай үршөөһэн шэнэ амидаралай ёһоор ажаһууна. Тэрэ хүн ондоо нүгэл хэхэггүй, ушарынь гэхэдэ, тэрэ Бурханһаа мүндэлөө. ¹⁰ Бурханай үхибүүд шолмосой үхибүүд хоёр хоорондоо иимэ илгаатай: үнэн зүб юумэ хэдэггүй хүнүүд, өөрынгөө ахада дурагүй хүнүүд адли – Бурханай бэшэ юм.

Бэе бээдээ дуратай байгты

¹¹ Бидэ бэе бээдээ дуратай байха ёһотойбди гэхэн мэдээсэл таанар анханһаа хойшо дуулаат. ¹² Бидэнэр Каин шэнги байха ёһогүйбди. Каин хадаа шоломосой түрэлэй байжа, дүүгээ алаа һэн.

Юундэ тиигээб гэхэдэ, Каинай үйлэ хэрэгын харатай муухай байгаа, харин дүүгэйн хэрэг үнэн зүб байгаа бшуу. ¹³ Аха дүүнэрни, таанарта газар дэлхэйнхин дурагүй байна гэжэ бү гайхагты. ¹⁴ Үхөөд амидыраат гэжэ бидэ мэдэнэбди, ушарын хадаа, аха дүүнэртээ бидэ дуратайбди. Аха дүүнэртээ дурагүй хүнүүд үхэхэн зандаа үлэнэ. ¹⁵ Аха дүүгээ үзэн ядагша алууршан гээшэ. Харин ямаршы алууршан мүнхын амидаралда хүртэдэггүй гэжэ таанар мэдэнэт. ¹⁶ Өөрынгөө ами наһы бидэнэй түлөө Христосой үгэһыень дуран гээшэ гэжэ бидэ ойлгонобди. Тиин бидэшы аха дүүнэрэйнгээ түлөө ами наһаяа үгэхэ ёһотойбди. ¹⁷ Энэ дэлхэйдэ юумээр дутадаггүй баян һуудаг хүн аад, аханар дүүнэрэйнгээ үгытэй ядуу һуухадань ханаагаа зободоггүй хүн: Бурханда дуратайб гэжэ яагаад хэлэжэ шадаха гээшэб? ¹⁸ Үхибүүдни, иигэжэ дэмы хоохон ама хэлээрээ дурлаһан хэбэр үзүүлээд бү байя, харин үнэхөөрөө дуратай байһанаа үнэн бодото хэрэгээрээ харуулая!

Бурханай урда этигэл зоригтой байха

¹⁹⁻²⁰ Үнэн бодото хэрэгтэ хабаатай байһанаа, Бурханай урда этигэл зоригтой байһанаа яажа мэдэхэбибди. Хэрбээ маниие зүрхэ сэдхэлнай зэмэлээ хаа, Бурхан бидэнэй зүрхэ сэдхэлһээ ехэ, бүгэдые мэдэгшэ юм гэжэ бидэ ойлгонобди. ²¹ Инаг хайрата аха дүүнэрни, хэрбээ зүрхэ сэдхэлнай маниие зэмэлээгүй хаань, Бурханай урда этигэл зоригтой байхабди. ²² Тиин бүхы эриһэн юумээ Бурханһаа абанабди, юундэб гэбэл, тэрэнэй захяа заабарие бээлүүлэн сахинабди, тэрээндэ найшаагдаха юумэ хэнэбди. ²³ Бурханай захяа заабаринь иимэ: Бурханай Хүбүүн Иисус Христосто этигэхэ, Иисус Христосой захиһан ёһоор бэе бээдээ дуратай байха зэргэтэйбди. ²⁴ Бурханай захяа заабарие сахигшад тэрээнтэй нэгэн хамта байна, Бурхан тэдэнтэй нэгэн хамта байна. Иигэжэл Бурханай бидэнтэй нэгэн хамта байдагы бидэ мэдэхэ аргатайбди, бидэндэ Бурханай заяаһан Нангин Һүлдэн ашаар мэдэхэ аргатайбди.

Бурханай Һүлдэ, Бурханай дайсанай Һүлдэ

4 ¹ Инаг хайрата аха дүүнэрни, али бүхы Һүлдэнүүдтэ бү этигэгты, Бурханһаа эльгээгдэһэн Һүлдэнүүд гү гэжэ шалгагты, юундэб гэбэл, худал хуурмаг лүндэншэд газар дэлхэй дээрэ олон болошонхой. ² Бурханай Һүлдые иигээд мэдэхэт: Иисус Христос хүн боложо, газарта ерээ гэдэг Һүлдэ бүхэн Бурханай Һүлдэ мүн. ³ Иисусые хүн

боложо, газарта ерээгүй гэдэг хүлдэ Бурханай бэшэ, харин Христосой дайсанай хүлдэ гээшэ. Тиимэ хүлдэ тухай таанар дуулаһан байнат, тэрэ хүлдэ газар дэлхэйдэ ерэхэ гэжэ таанар мэдэнэт, тэрэнь дэлхэйдэ ерэшоод байна. ⁴Үхибүүд, таанар Бурханһаат, тиимэһээ худал хуурмаг лүндэншэдые диилээт, яахадааб гэбэл, таанарай доосоо байдаг Бурхан газар дэлхэйдэ байдаг шолмосчоо ехэ юм. ⁵Тэдэ хуурмаг лүндэншэд газар дэлхэйнхин мүн, юундэб гэбэл, тэдэнэр газар дэлхэйнхинэй хэлээр дуугаралсана, газар дэлхэйнхин тэдэ лүндэншэдэй хэлэһые шагнана. ⁶Харин бидэнэр Бурханай хүнүүдбди. Тиимэһээ Бурхание мэдэгшэнь бидэниие шагнана, Бурханай бэшэ хүн шагнанагүй. Иигэжэл бидэ үнэн зүбэй хүлдые худал хуурмагай хүлдэһөө илгаруулан мэдэнэбди.

Бурхан гээшэ дуран мүн

⁷Инаг хайрата аха дүүнэрни, бэе бээдээ дуратай байябди, юундэб гэбэл, хайра дуран Бурханһаа заяагдаһан юм. Али бүхы хайра дуратай зон Бурханһаа түрөө, Бурхание мэдэнэ. ⁸Хайра дурагүй хүн Бурхание мэдэнэгүй, яахадааб гэхэдэ, Бурхан гээшэ дуран мүн. ⁹Бидэндэ дуратай байдагаа Бурхан иигэжэ харуулаа: Хүбүүгээрнь дамжан бидэнэй мүнхэдөө амиды ябахын тула Бурхан ори ганса Хүбүүгээ газар дэлхэйдэ эльгээгээ. ¹⁰Дуран гээшэ иимэ: Бурханда бидэ дурлаагүйбди, Бурхан өөрөө бидэндэ дурлажа, бидэнэй хэһэн нүгэлэй түлөө үргэл болгон, өөрынгөө Хүбүүе эльгээгээ. ¹¹Инаг хайрата аха дүүнэрни, Бурханай иимэ ехээр манда дурлаһан хадань бидэшье бэе бээдээ дуратай байха ёһотойбди. ¹²Бурхание хэншье хэээшье хараагүй юм. Теэд хэрбээ бидэнэй бэе бээдээ дуратай байхада, Бурхан бидэнтэй нэгэн хамта байна гээшэ. Бурханай дуранинь бидэнэй зүрхэ сэдхэлдэ тон ехэ юм. ¹³Бурхан бидэнтэй нэгэн хамта байна гү, бидэ Бурхантай нэгэн хамта байна гүбди гэжэ маанадта Бурханай заяаһан Нангин Һүлдөөрнь мэдэнэбди. ¹⁴Эсэгэ Бурхан газар дэлхэе Абарагша болгон, Хүбүүгээ эльгээгээ гэжэ бидэ хараабди, гэршэлэн баталнабди. ¹⁵Иисус болбол Бурханай Хүбүүн гэжэ мэдэрдэг хүн Бурхантай нэгэн хамта байна, Бурхан тэрэ хүнтэй нэгэн хамта байна. ¹⁶Бидэндэ Бурхан дуратай гэжэ мэдээд, бидэ тэрэ дурандань этигэн найданабди. Бурхан болбол дуран гээшэ. Хайра дуратай хүн Бурхантай нэгэн хамта байдаг, Бурхан тэрэ хүнтэй нэгэн хамта байдаг, Бурхан тэрэ хүнэй досоонь байдаг. ¹⁷Энээгээрээ дуран бидэнэй зүрхэ сэдхэлдэ тон ехэ байна. Тиимэһээ

Зарга шүүбэрийн болохо Үдэрые бидэ айнгүйгөөр угтахабди, юундэб гэбэл, энэ дэлхэйдэ бидэнэр Христостол адляар ажаһуунабди. ¹⁸ Дуран айхые мэдэдэггүй: ёһотой дуран айлтые зайлуулдаг, яахандааб гэбэл, айха гээшэ хэһээлтэтэй холбоотой, тиигээд хэн айнаб, тэрэ хүн дуранай эрхим шанарые туйлаагүй гээшэ. ¹⁹ Бидэ Бурханда дуратайбди, юундэб гэбэл, бидэндэ түрүүшээр Бурхан дурлаа. ²⁰ «Би Бурханда дуратайб» гэдэг аад, өөрынгөө ахада дурагүй хүн худалша гээшэ. Ахаяа хаража байгаад, тэрэндээ дурагүй хүн Бурхание хараагүй аад, Бурханда дурлахагүй бшуу. ²¹ Бидэндэ Бурхан иимэ захяа заабари үгөө: Бурханда дуратай хүн ахадаашье дуратай байха ёһотой.

Бурханда этигэдэг хүн оршолонто дэлхэе дишлэнэ

5 ¹ Иисус Бурханай табисуурта мүн гэжэ этигэдэг хүн бүхэниие Бурхан бүрилдүүлээ. Эсэгэ Бурханда дуратай хүн Бурханай үхибүүдтэше дуратай юм. ² Бурханай үхибүүдтэ дуратай байһанаа иигэжэ мэдэнэбди: Бурханда дуратай наа, тэрэнэй захяа заабариение сахинабди. ³ Бурханай захяа заабариение сахихадаа, Бурханда бидэ дуратай байнабди. Бурханай захяа заабаринь хүшэр хүндэ бэшэ юм. ⁴ Бурханнаа түрэнэн хүн оршолонто дэлхэе диилэгшэ юм. Бидэнэй этигэл найдабари болбол илалта мүн. Тэрэ этигэлэйнгээ ашаар бидэ оршолонто дэлхэе диилэнэбди. ⁵ Иисус Бурханай Хүбүүн гэжэ этигэдэг хүн лэ дэлхэе илагша юм. ⁶ Тэрэ бидэндэ уһа шуһан хоёртой ашаар ерээ. Тэрэмнай Иисус Христос мүн. Иисус уһаннаа гадна, уһа шуһан хоёртой хамта ерээ. Энээниие Нангин Һүлдэ гэршэлнэ, яахандааб гэбэл, Нангин Һүлдэ үнэн бодото зүйл мүн. ⁷ Тэнгэридэ гурбан гэршэ бии бшуу: Эсэгэ, Үгэ, Нангин Һүлдэ гурбан. Эдэ гурбан гэршэнүүд нэгэл юумые баталан гэршэлнэ. ⁸ Газар дээрэ Һүлдэ, уһан, шуһан гурбан гэршэлнэ. ⁹ Бидэ хүнэй гэршэлһыел хараадаа абанабди, харин Бурханай гэршэлгэ хүнэй гэршэлгэһээ холо шухла юм. Энэ Бурханай өөрын гэршэлгэ мүн: Бурхан өөрынгөө Хүбүүн тухай гэршэлнэ. ¹⁰ Бурханай Хүбүүндэ этигэдэг хүнэй зүрхэ сэдхэлдэнь энэ гэршэлгэнь байна. Харин Бурханда этигэдэггүй хүн Бурхание худалша мэтэ харуулжа байна, ушарын гэбэл, Бурханай өөрынгөө Хүбүүн тухай гэршэлхэдэнь, тэрэ хүн этигээгүй. ¹¹ Иимэ гэршэлгэ байгаа: Бурхан бидэндэ хэтэ мүнхын амидарал олгоо. Бурханай Хүбүүн хэтэ мүнхын амидаралай эхин мүн. ¹² Бурханай Хүбүүнтэй хүндэ хэтэ мүнхын амидарал үршөөгдэхэ, Бурханай Хүбүүнгүй байһан хүндэ тиимэ амидарал үгтэхэгүй.

Хэтэ мүнхын амидарал тухай

¹³ Таанадта хэтэ мүнхын амидаралай үршөөгдэһые мэдэжэ байхынтнай тула Бурханай Хүбүүнэй алдар нэрэдэ этигэгшэ таанарта хандан, эдэ бүгэдые би бэшэбэб. ¹⁴ Тиимэһээл Бурханай урда этигэл зоригтой байхабди. Бурханай дура хүсэлөөр бидэнэй юушые эрээ наа, Бурхан дуулажа байна. Энээндэ бидэ этигэн найданабди. ¹⁵ Юу эриһыемнай Бурханай дуулажа байһые мэдэжэ байһан туладаа, Бурханһаа эриһэн бүхы юумые бидэ абахабди гэжэ мэдэнэбди. ¹⁶ Хэрбээ ахань үхэлдэ хүргэдэггүй нүгэл хэнэ гэжэ мэдэжэ хаража байһан хүн Бурханда мүргэг, тиихэдэнь Бурхан тэрээниие амиды байлгаха. Үхэлдэ хүргэдэггүй нүгэл хэнэн хүн тухай эндэ би хэлэжэ байнаб. Харин үхэлдэ хүргэдэг нүгэл гэжэ бии юм. Тиимэ нүгэл хэгшэдэй түлөө зальбарха ёһотой гэжэ би эндэ хэлэнэгүйб. ¹⁷ Үнэн бэшэ алишые үйлэ нүгэл гээшэ, теэд үхэлдэ хүргэдэггүй нүгэл гэжэ бии юм. ¹⁸ Бурханһаа түрэнэн хүн бүхэн нүгэл хэгшэгүй гэжэ бидэ мэдэнэбди: Бурханһаа түрэнэн хүниие Бурханай Хүбүүн хаража аршалжа байдаг. Шолмос тэрэ хүндэ муу юумэ хэжэ шадахагүй. ¹⁹ Бидэ Бурханай үхибүүдбди, бүхы газар дэлхэйнхин шолмосой эрхэ мэдэлдэ байна гэжэ мэдэнэбди. ²⁰ Ёһотой Бурханиие бидэнэй танидаг болохын тула маанадта Бурханай Хүбүүн ерэжэ ойлгуулаа гээд бидэ мэдэнэбди. Бидэ Бурхантай нэгэн хамта, тэрэнэй Иисус Христостой нэгэн хамта байнабди. Иисус Христос хадаа ёһотой Бурхан гээшэ, хэтэ мүнхын амидарал гээшэ. ²¹ Үхибүүд, өөһэдыгөө хуурмаг бурхадһаа һэргылжэ ябагты.